

Editorial



Ya ta 9 Aña

TA riba un dia 24 di januari, 9 aña pasa, cu The Media Group a lanza su prome corant, cu ta conoci como AWE**Mainta**. E tabata un bispo di celebracion di Dia di Betico, y como un corant carga cu tanto felicitacion, mi a dicidi di traha mi editorial awe dia 26 di januari, y e celebracion semper ta tuma lugar Dia di Prensa, cu un Dia di Famia.

Pero mi no por laga e dia aki sin pasa, pa gradici tur hende cu a haci publicacion di AWE**Mainta** posibel 9 aña pasa. Na cuna di nacemento di AWE**Mainta**, tabata para mi yiu homber, Victor Ricardo, hunto cu su casa Sucila y nan hunto cu sosten di mi señora, Ramona y mi yiu muher Xiomara y demas famia, sigur di mi tata Cay Winklaar, awe nos por mira riba 9 aña masha exitoso.

Ta logico cu e no tabata facil, pero contrario loke cu a ser bisa di AWE**Mainta**, cu el a nace morto, awe esnan cu a desea esey, mester keda desapunta.

Mi kier a gradici sigur tur nos lectornan, cu na inicio di AWE**Mainta**, tabata cumpra e corant aki, y tin cu a abona, pero cu despues nos a dicidi sigui ehempel di corantnan grandi, cu a dicidi di bira corantnan pornada, y di e manera ey, aumenta nan circulacion. Esey t'e caso tambe cu AWE**Mainta**, y awe na celebracion di su 9 aña, ta un corant grandi y di un circulacion masha grandi, sigur como e prome corant electronico y gratis.

Masha danki n'e comerciantenan cu ta kere den AWE**Mainta** y a sa di haya bek e inversion haci den AWE**Mainta**, cu nan propaganda.

Mi no por keda sin gradici, e team di AWE**Mainta** cu a para tambe na su nacemento, un grupo chiquito, di periodista, repartidor, bendedor, y e team di administracion, pues tur cu ta labora na AWE**Mainta** te ainda. Nan t'e motor tambe tras di e exito di AWE**Mainta**, cu manera menciona ta existi awor pa 9 aña.

Durante e 9 añanan aki, a nace un otro producto di The Media Group N.V. cu ta Den Noticia, un vespertino den oranan di atardi. El a bin cu e meta pa yena e bashi cu tin den un corant den oranan di atardi, na Papiamento. E tambe ta gratis y tur esnan interesa por hay'e den nan inbox, si nan registra, mescos cu AWE**Mainta**. Te ainda no tin decision pa imprimi Den Noticia, y no t'e intencion tampoco, maske tin masha demanda p'esaki.

Semper na ocasion di nos aniversario, mi ta gusta lanza ideanan nobo y p'e aña aki, lo bolbe evalua hunto cu mi team si nos mester re-activa e corant na Ingles, AM, pero tampoco cu e intencion p'e wordo imprimi, pero mi kier sigui pa proteha nos medio ambiente y sigui haci di e tecnologia esta di e.o. lague como uno uno electronico.

Nos ta sigui conseho di nos siguidornan y ta bon pa nan manda nan sugerencia pa nos redaccion.

Pa finalisa, un biaha masha danki na tur hende, sigur e gran cantidad di hende cu ta subscribi pa recibi nan AWE**Mainta** den nan inbox, cu ta haci cu awe AWE**Mainta** t'e corant mas grandi den circulacion riba internet. Masha masha danki y keda pendiente pa futuro plannan.

